


Ni Pangulong
Thomas S. Monson



Importante nga mga Promisa sang Libro ni Mormon

Madamo nga tinuig na ang nagligad nagatindog ako sa kilid sang kama sang isa ka lamharon nga amay samtang sia tagumatayon. Ang iya nagakalisod nga asawa kag ang ila duha ka kabataan nagatindog sa unhan. Ginkaptan niya ang akon kamot kag, nga nagapakitluoy, nagsiling, "Bishop, nakahibalo ako nga lapit na lang ako mapatay. Sugiri ako kon ano ang matabo sa akon espiritu kon mapatay ako."

Nagpangamuyo ako sing likom para sa langitnon nga giya kag natalupangdan ko sa lamisa sa kilid sang iya kama isa ka kopya sang triple combination (tatlo ka balaan nga mga kasulatan). Ginkuha ko ang libro kag maabtik nga ginbukad ang mga pahina. Sa hinali nadiskubrehan ko nga, wala sang pagtinguha sa akon bahin, nagdulog ako sa ika-40 nga kapitulo sang Alma sa Libro ni Mormon. Ginbasa ko ining mga pulong sa iya:

"Yari karon, ginpahibalo sa akon sang isa ka anghel, nga ang mga espiritu sang tanan nga mga tawo, pagkatapos gid nga magtaliwan sila gikan sa sining mama-latyon nga lawas, . . . ginadala pauli sa sinang Dios nga naghatag sa ila sing kabuhi.

"Kag . . . ang mga espiritu sadtong mga matarong pagabatunon sa isa ka kahimtangan sang kalipayan, nga ginatawag nga paraiso, isa ka kahimtangan sang

pagpahuway, isa ka kahimtangan sang paghidaet, nga sa diin magapahuway sila gikan sa tanan nila nga mga gumontang kag gikan sa tanan nga mga kabalaka, kag kasubo" (Alma 40:11-12).

Samtang padayon ko nga ginabasa ang parte sa Pagkabanhaw, may kasanag nga naglikop sa nawong sining lamharon nga lalaki kag isa ka yuhum nagtuhaw sa iya mga bibig. Sang manuglakat na ako, nagpaalam ako sa sining mapinalanggaon nga pamilya.

Madason ko nga nakita ang asawa kag ang kabataan sa lubong. Ginhunahuna ko inang gab-i nga ang isa ka lamharon nga lalaki nagpaketluoy para sa kamatuoran kag, gikan sa Libro ni Mormon, nabatian ang sabat sa iya pamangkot.

Gikan sa Libro ni Mormon makita ang iban pa nga importante nga mga promisa, lakip ang mga promisa sang paghidaet, kahilwayan, kag mga bugay kon kita "lamang magaalagad sa Dios sang kadutaan, nga amo si Jesucristo" (Eter 2:12).

Gikan sa mga pahina sini makita ang promisa sang "di-matapos nga kalipayan" sa "sadtong mga nagatuman sang mga kasuguan sang Dios. Kay yari karon, gina-pakamaayo sila sa tanan nga mga butang, alangay nga umalagi kag espirituhanon" (Mosias 2:41).

Gikan sa mga pahina sini makita ang promisa sang “di-mahangpan nga kalipay” sa ila nga nangin “[mga] galamiton sang Dios” sa pagluwas sang Iya pinalangga nga mga anak (Alma 28:8; 29:9).

Gikan sa mga pahina sini makita ang promisa nga ang naglinapta nga Israel pagatiponon—isa ka buluhaton sa diin ginahimud-osan naton paagi sa aton dako nga malapnagon nga pang-misionaryo nga mga buluhaton (tan-awa sa 3 Nefi 16; 21–22).

Gikan sa mga pahina sini makita ang promisa nga sa aton pagpangamuyo sa Amay sa sagrado nga ngalan ni Jesucristo, ang aton mga pamilya pagabugayan (tan-awa sa 3 Nefi 18:21).

Gikan sa pagtuon sang mga pahina sini makita ang katumanan sang mapanagnaon nga promisa nga “may magaabit sa inyo mga kabuhi kag sa inyo mga puluy-an sing dugang nga pagpadasig sang Espiritu sang Ginuo, isa ka ginpabakod nga promisa nga maglakat sa pagtuman sang Iya mga kasuguan, kag mas mabaskog nga panaksihon sang buhi nga pagka-matuod sang Anak sang Dios.”¹

Kag gikan sa mga pahina sang Libro ni Mormon makita ang promisa ni Moroni nga paagi sa pangamuyo, matuodtuod nga tinutuyo, kag pagtuo kay Cristo, mahimo naton mahibaloan ang kamatuoran sining mga promisa “paagi sa gahum sang Balaan nga Espiritu” (tan-awa sa Moroni 10:4–5).

Upod sang iban nga mga propeta sa ulihing mga

adlaw, nagasaksi ako sang pagkamatuod sining “labing husto sa ano man nga libro sa duta,”² nga amo ang Libro ni Mormon, isa pa ka katipan nahanungod kay Jesucristo. Ang mensahe sini nagalikop sang kalibutan kag nagadala sang mga bumalasa sini sa paghibalo parte sa kamatuoran. Nagapanaksihon ako nga ang Libro ni Mormon nagabag-o sang mga kabuhi. Kabay nga ang tagsa sa aton magbasa sini kag magbasa sini liwat. Kag kabay nga malipayon naton nga ipaambit ang aton mga panaksihon parte sa importante nga mga promisa sini sa tanan sang mga anak sang Dios.

MGA TANDA

1. Gordon B. Hinckley, “A Testimony Vibrant and True,” *Liahona*, Ago. 2005, 6.
2. *Teachings of Presidents of the Church: Joseph Smith* (2007), 64.

PAGTUDLO GIKAN SA SINING MENSAHE

Sa balaan nga mga kasulatan “makita naton ang mga prinsipyo sang kamatuoran nga magalubad sang tagsa ka palaligban kag tagsa ka problema kag tagsa ka kabudlayan nga magasugata sang tawhanon nga pamilya” (*Teaching, No Greater Call* [1999], 51). Sam-tang ginapaambit ninyo ang mensahe ni Pangulong Monson sa pamilya, agdaha sila nga magpamati sa “importe nga mga promisa” nga iya ginalawag sa Libro ni Mormon. Mahimo kamo magpaambit sang isa ka promisa sa Libro ni Mormon nga nangin makahuluganon sa inyo.



Kon Indi Kita Magduhaduha

Tun-i ining materyal kag, sa nagakaigo, hambalini upod sang mga sister nga inyo ginabisita. Gamita ang mga pamangkot agud buligan kamo sa pagpabakod sang inyo mga sister kag himuong ang Relief Society nga aktibo nga bahin sang inyo mismo kabuhi.

Sa Libro ni Mormon mabasahan naton ang parte sa dalayawon nga mga lamharon nga lalaki nga tuman kabakod, kaisog, kag kabaskog. “Huo, mga lalaki sila sang kamatuoran kag kaligdong, kay gintudluan sila sa pagtuman sang mga kasuguan sang Dios kag sa paglakat sing tadlong sa iya atubang” (Alma 53:21). Ining matutom nga mga lamharon nga lalaki nagpasidungog sang ila mga iloy—ang ila mga ehemple kag mga manunudlo.

Ang mga iloy sang mga hangaway ni Helaman nagkabuhi sa mga panahon nga indi maglayo sang aton karon. Ang ila mga sirkumstansya nangin mabudlay kag delikado, kag ang mga lamharon ginatawag agud pangapinan ang pisikal kag espirituhanon nga kahilwayan. Karon nagakabuhi kita sa isa ka kalibutan sa diin kita “indi nagapakig-away batok sa unod kag dugo, kundi batok sa mga punoan, batok sa mga kagamhanan, batok sa mga manugdumala sang kalibutan sining kadudulman karon, batok sa espirituhanon nga mga kabon sang kalautan sa langitnon nga mga duog” (Mga Taga-Efeso 6:12).

Ang makahalangkat nga panahon nagakinahanglan sing mabaskog nga mga ginikanan kag

mga ehemple nga nagatudlo sang kamatuoran nga nahibaloan sang mga hangaway ni Helaman: “Kon indi sila magduhaduha, pagaluwason sila sang Dios” (Alma 56:47). Ang pagtudlo kag pagpakita sining kamatuoran karon nga panahon nagakinahanglan sang pagbantay. Apang, indi kita kinahanglan magkahadlok. Kon nakahibalo kita kon sin-o kita kag kon sin-o ang Dios kag nakahimo kita sang mga kasugtanang sa Iya, kita—pareho sining mga iloy sang mga hangaway—makahimo sing dako nga impluwensya para sa kaayuhan.

Possible gid nga ang tagsa sa 2,060 ka mga hangaway ni Helaman gin-impluwensyan sang isa ka iloy. Apang ining mga iloy wala naghimo sini nga silahanon lang. Upod sa iban nga matarong mga lalaki kag mga babayi, ining mga iloy mahimo nga nakigisa sang ila pagtuo kag ehemple agud itudlo ang gahum sang mga kasugtanang. Ang mga lamharon sadtong panahon nakahangop sang kasugtanang nga ginhimo sang ila mga ginikanan nga indi mag-entra sa inaway. Kag bisan pa nga daw impossible, ang isa ka mapinalanggaon nga Amay nga Langitnon nagbukas sang alagyan para sa sining mga ginikanan nga

matuman ang ila kasugtanang—kag mapangapinan ang ila kahilwayan (tanawa sa Alma 56:5–9). Kita man dapat magtahod sang aton mga kasugtanang agud nga ang kabataan kag mga lamharon—ang aton kaugalingon nga kabataan kag sadtong sa aton mga ward, mga branch, mga kasilingan, kag mga komunidad—makahangop kag magsakdag sang pagtuman sang kasugtanang.

Kon ginatahod naton ang aton mga kasugtanang, ang Amay nga Langitnon magahanda sang alagyan para sa aton. Dapat naton ipangabuhi ang aton mga kasugtanang sing eksakto. Sarang kita, halimbawa, mangin eksakto sa pagpangamuyo, sa pagtuon sang balaan nga mga kasulatan, sa pagangkon sang bag-o nga temple recommend, sa pagbiste sing maugdang, sa pagtahod sang Adlaw nga inugpahuway [Sabbath]. Sa paghimo naton sini, ang aton kabataan makahibalo kag makasiling, “Wala kami nagaduhaduha nga nahibal-an ini sang amon mga iloy” (Alma 56:48).

Ang mga babayi nga mga Santos sa Ulihing mga Adlaw nga naga-kilala nga ang ila kusog naggikan sa Pagpasag-uli [Atonement] sang Ginuo wala nagaampo sa tion

sang kabudlayan kag kapaslawan. Bilang mga nagatuman sang mga kasugtanan, nagapangbabaw kita sa pagsakdag, pagbatiti, kag pag-amlig sang mga kabataan kag mga lamharon agud nga sa pila ka

adlaw mahimo kita maghambal parte sining ulihing tubo, "Wala pa gid ako nga mas-a makakita sang sapagkadako nga kaisog, wala, wala sa tunga sang tanan" (Alma 56:45).

Julie B. Beck, pangkabilugan nga pangulo sang Relief Society.

Gikan sa Balaan nga mga Kasulatan

Alma 53; 56–58

Ano ang Sarang Ko Mahimo?

- 1.** Paano ko mabuligan ang akon kauturan nga babayi nga kilalahon kag maghikot sang gahum nga may yara sila agud impluwensyahan ang ulihing tubo?
- 2.** Ano nga inspirasyon ang akon makita sa Libro ni Mormon agud masabat ang mga hangkat nga ginaatubang ko sa karon?

Para sa dugang nga impormasyon, mag-log on sa www.relfiefsociety.lds.org.